

四庫全書

史部

欽定四庫全書

史部

畿輔通志卷二十二

詳校官監察御史_臣劉人睿

檢討_臣德生覆勘

總校官進士_臣繆琪

校對官中書_臣孫球

謄錄監生_臣張永浙

欽定四庫全書

畿輔通志卷二十二

川

保定府

清苑河 在清苑縣南一名沈水源出雞距泉經縣

城南折而東北合徐河

北平縣有沈水東經其城又東南入徐水

水經注

清苑縣因清苑河為名

太平寰宇記

清苑河源出府西雞距泉亦名沈水

方輿紀要

清苑河流經縣城南分流繞城為濠有東上東下

兩閘啟閉蓄洩天津賈舶直抵南城下

縣志

雞距泉與一畝泉合流為清苑河由縣而東與徐

河合

輿圖

徐河 一名順水源出易州五迴嶺經滿城縣為大

冊河至安肅縣為徐河過清苑縣北折而東入安

州為依城河

徐水西出廣昌縣東南大嶺下嶺有五迴三源奇發齊瀉一澗東流轉北逕北平縣漢光武追銅馬五幡於北平破之順水即徐水之別名也東經蒲城北又東逕清苑城與沈水合

水經注

徐河發源易州五迴嶺流經滿城縣北一十里名大冊河至安肅縣南四十里為徐河又經清苑縣

北十五里折而東達安州境

明一統志

徐水自清苑縣流入與依城河合

安州志

方順河在滿城南祈水下流也在完縣為曲逆河東入滿城縣為方順河又東流至清苑縣為石橋河與清苑河合

方順河在滿城縣南五十里其上源即完縣之祈水也東流至縣境曰方順河又東經清苑縣南二十里曰石橋河合於清苑河

方輿紀要

奇邨河在滿城縣東即一畝泉與雞距泉合流處清苑河上流也以經奇邨故名

渝河 在滿城縣西十五里

渝河發源易州嶺流徑縣西北伏流於地幾三十里出為一畝泉書云水在地中曰渝

舊志

曹河 即曹水在安肅縣南二十五里源出曹河澤由西釜山經縣東南至安州合於徐河

曹水西北出朔寧縣曹河澤東南流經北新城縣

故城南又東入於徐水

水經注

曹河至新城縣西南與徐河合曰溫義河

府志

曲水河 在安肅縣西四十里源出狼山與電河合

沙河 在定興縣西北亦曰適闌河源出涑水縣平

樂山東經縣界入於巨馬河

沙河即適闌河在涑水縣西十五里發源本縣平

樂山流至定興為沙河入拒馬河

陸隴其畿輔地圖記

北河 在定興縣南河陽渡巨馬沙易會流於此下

流為白溝河

河陽渡係涑易沙三水會流處俗曰北河

興圖

渾河 在新城縣東三十里

渾河至順天府固安縣南分一枝入新城縣東轉

入霸州 輿圖

琉璃河 在新城縣東自涿州流入東合紫泉河

按舊志新城縣東有南里河即琉璃河支流也
舊止小溝明嘉靖中其溝自底突湧裂土成河
與運河相通

本朝康熙中琉璃河自涿州逕此流入紫泉河

紫泉河 在新城縣東北源出縣西北十五里龍堂村至縣十里合琉璃河又南入白溝河

斗門河 在新城縣西源出縣西北李家營即宋何承矩闢斗門興水利處由界河西溝東入高橋窪界河 在新城縣南巨馬河支流也流經縣南入定興界與斗門河合又南入於白溝

白溝河 在新城縣南巨馬易沙三水合流於定興之河陽渡為白溝河南流至縣界東經容城縣至

雄縣城南東入茅兒灣達玉帶河其分流亦由容
城縣過雄縣西為黃灣河又折入新安合四角河
白溝河在新城縣南十里由定興縣南流來定興
河陽渡為涑易沙三河會流處俗名北河經容城
至雄縣南東流茅兒灣入玉帶河一支由容城縣
分流至雄縣西三里名黃灣河又經新安流入四

角河

輿圖

白溝河自白溝店曲折而南五里為高橋又南十

五里為趙村橋又南十餘里為西槐村迤東七八里至雄縣環城西南經瓦濟橋土人謂之清河又東為亞谷橋又東為大陰橋又東迤南為柴禾淀始與九河合流入茅兒灣

舊志

白溝河自雄縣之古縣村西南逆流過新安縣之大楊村入燒車淀亦與九河合流而東

新安縣志

馬村河 在新安縣西北自涑水縣巨馬河分流入縣南合於白溝

馬村河本自巨馬分流由涑水縣東南境赤土社

經縣之馬村故名又東南流合於白溝

方輿紀要

魚池河

在新城縣東北十五里其水無源由交渠

鳴澤經倉上入縣東趙莊窪又龍灣河在縣東北

二十五里亦無源自河頭村平景孟良營溢入趙

莊窪

橫河

即古恒水在唐縣西南七十里源自曲陽縣

流入縣界合於唐河

恒水出常山曲陽縣東入滏水

尚書正義

橫河源出曲陽縣龍泉鎮東徑十八渡與唐河合

即古恒水也

舊志

唐河在唐縣西南即滏水也源出山西大同府靈邱縣流入倒馬關經完縣西北又南入唐縣界又東南入慶都過曲陽定州至祁州三岔口與滋沙二河合

滏水出代郡靈邱縣高氏山

水經

滏水東逕倒馬關又東逕唐縣故城俗亦謂之唐

水

水經注

唐河在唐縣西一百五十步在慶都縣西南四十

二里

元和志

景德元年北面都鈐轄閻承翰自嘉山東引唐河

至定州

宋史河渠志

唐河在縣西北七十里即滏水也南入唐縣界

完縣

志

唐河舊在縣西南二十里折而東經縣南十里其

後決而南趨自符城以東瀆為沙川十餘里

唐縣志

唐河在縣南自唐縣流入

慶都縣志

唐河在州南十五里自定州流入至州東與沙滋

二河合曰三岔口

祁州志

灣里河在唐縣西北四十里源出縣西北蔡莊北

山流經灣里長店至大洋社注於唐河

放水河在唐縣東北源出石臼泉流經完縣入方

順河

唐縣東北三十里有石曰泉流為放水河至完縣界合五雲泉入方順河

輿圖

龍塘河 在博野縣南相傳有龍自七公河順流蕩其地通於蟾河

蟾河 在博野縣東南二十五里滏滋沙三水合流至縣境為蟾河入蠡縣為楊村河

滏滋沙三水自祁州三岔口合流至博野縣名蟾

河

陸隴其巖
輞地圖記

清水河 在慶都縣西

清水河 在慶都縣西一里經縣南東二里合於龍

泉河

方輿
紀要

龍泉河 在慶都縣西北平地湧泉匯而為河與清

水河合入唐河

慶都縣西三里有堅功泉又西一里有西堤泉又
縣西南有沈家泉湧魚泉俱平地湧出合為龍泉

河其下流滙於唐河

方輿紀要

壩龍河 在慶都縣西南五里東北流七里合於清

水河

護城河 在慶都縣南門外發源城東九泉流至清

苑縣楊城村入方順河

楊村河 在蠡縣南十里滋沙滙三水下流也自祁

州經博野縣流入縣界北至高陽曰布裏河

楊村河在蠡縣南滋河沙河唐河之水自祁州合流經

博野縣入縣界為楊村河又北經玉田渚口入高

陽縣境

方輿紀要

泔河在蠡縣東二十里楊村河支流也下流亦入

高陽界又縣西舊有小陳河源出慶都東北流入

安州今淤

黃灣河在雄縣西三里白溝分流也

詳白溝河

高陽河在雄縣南二十里上流即新安縣之猪龍

河入縣界為高陽河由蓮花淀入四角河

雄河 在雄縣南三里自安州易水即依城河分流
周環縣城經瓦濟門東下即護城河也亦曰瓦濟
河又閘河在縣南五里相傳為宋楊延昭運糧河
派河 一曰沙河在祁州西南自定州流入與滌滋
二水合流沙水即派河源出山西由定流入祁州
三岔口與滌滋二水合

輿圖

滋河 一名濱河在深澤縣西北八里源出山西流
經正定府自無極縣流入縣界又東北入祁州合

滹沙二水

滋河源出山西流經正定府境內自無極縣流入

縣界

方輿紀要

滋河在縣西十里上自正定府無極縣流入下流

至祁州三岔口合滹沙二水

輿圖

滹沱河 在東鹿縣西南四十里自晉州流入又東

入深冀二州界

滹沱河在縣南二十五里上自晉州流入經縣南

下流入冀合滏漳二河

輿圖

滹沱自晉州東七十至東鹿縣

本朝順治十二年自晉州境內寨子村決入縣境百尺

口歸清水河康熙五年復自晉州決入分爲五道

一由縣彭六左劉家莊西一由縣漢口村俱流入

冀州境歸清水河一由縣傾井村一由縣張岔口

村一由縣棗營村俱流入深州境歸清水河

東鹿縣志

按漢書注滹沱水經深澤縣東南寰宇記河在

高陽縣東北二十里是昔時高陽深澤之境皆
河所經也今徙而南在東鹿晉冀之間衝啗為
甚

鴉兒河 在東鹿縣南十里滹沱分流也舊自縣東
北達博野縣合於唐河後東入深州界仍合於滹
沱今滹沱南徙河亦漸淤

依城河 在安州北卽徐曹諸水下流也東入新安
為長流河

依城河在安州北關外上流卽徐河一畝泉方順

河諸水下流入新安長流河

輿圖

按水經注漉水東北逕依城北世謂之依城河

則以漉水為依城河而方輿紀要云安州為九

河下流九河者徐曹方順一畝

卽清苑河

滋沙漉鴉

兒與州之易水合而為九河是又以易水為依

城河今攷輿圖唯徐河自清苑合曹及方順一

畝諸水達州界為依城河其漉滋沙三水合於

祁州由博野高陽入猪龍河其鴉兒河則舊自
滹沱分流入滏今滹沱南徙鴉兒故道亦淤
邱家道口河 在安州東南三十里自高陽馬家河
分流經州界下流入白洋淀

淘河 在安州東南依城河之分支也

淘河易水東出之別名也宋人以塘泊為邊備往
往疏濬以防淤澱故沿邊諸水皆曰淘河

方輿
紀要

布裏河 在高陽縣東二十里本馬家河上流卽蠡

縣之楊村河東入新安為猪龍河

按舊志馬家河在縣東即蠡縣楊村河下流也
上承滌滋沙三水舊自蠡縣東入河間明正德
中自蠡縣北決入縣界猪為淀又東北入安州
界嗣後時有決溢天啓中決入布裏愚地等村
故又曰布裏河

本朝康熙初復由布裏東決合猪龍河

高河 在高陽縣東二十五里舊自蠡縣流入縣界

會猪龍河今淤又縣西南六里舊有運河相傳為
宋時轉餉處今亦淤

猪龍河 在新安縣南六十里即高陽之馬家河也
流入雄縣為高陽河

高陽故城東龍化村是猪龍河也俗傳顓頊時有
猪化龍而成是河故名

名勝志

長流河 一名長溝河在新安縣西南五里其上流
有二皆自安州來一曰依城河

即徐水

一曰電河

即南

水易至縣界合流曰長流河東南入四角河

長流河一名長溝河在新安縣西南五里方輿紀要

徐水至安州為依城河至新安合電水為長流河

四角河一接新安之長流河陸隴其畿輔地圖記

按明統志長流河源自電水在縣西五里又溫

義河源自徐河在縣西南八里南與長流河合

蓋依城河入新安亦名溫義至合電河則總名

長流也

三岔河 在新安縣南八里上接溫義下達四股南
通猪龍故名

四股河 亦名四叉河在新安縣東南十五里上納
長流河下達於任邱之四角河

四叉河上承溫義中流為叉一通王家寨一通寨
南一通店頭一通四角河相傳元至正時鑿

保定府志

梁頭河 在新安縣南三里自長流河分流下達於
雄縣之瓦濟河

縣南三里有梁頭河明景泰間䟽長流河引流自城西南隅過南門至東門外三里末流達於瓦濟

河

方輿紀要

稠河 在新安縣東六里一名試牛河亦長流河之支也

魚水 在滿城縣西南

魚水出北平縣西南魚山東流注於浦水

水經注

南昌水 在安肅縣西

南昌水東流過梁門去縣西二十里引為陂塘以

溉民田

輿地志

馬溺水 在唐縣西

馬溺水出上曲陽城東北東流注於漚

水經注

鴻上水 在唐縣西北

漚水東流鴻上關於是左納鴻上水水出近溪東

流注於漚

水經注

祈水 卽南濡古曰曲逆水在完縣西南源出伊祈

山曲折東流入滿城縣為方順河

濡水出蒲陰縣西枉渚迴湍率多曲復亦謂之曲

逆水也

水經注

濡水今謂之祈水出伊祈山曲折東流經縣南又

東經滿城為方順河

完縣志

五靈水 在完縣西二十里一名五雲泉源出大菟

山五竅如龍流至縣西南十里合祈水

九流水 在完縣西二十里發源伊祈山平地九泉

淺而不竭又店頭水在縣西三十里二水並合五雲泉入祈水

蒲水 源出完縣西北三十里東南流合祈水

蒲水出蒲陽山東南流經蒲陰縣故城北東入濡

水經
注

蒲水發源縣西北三十里道務村流縣北又東流

至曲逆故城東南與曲逆水合

舊志

按水經注有蘇水出曲逆縣西南近山東北流

與蒲水並入於濡今源流無攷

博水 在完縣東南

博水在完縣東南水經注博水出望都縣其流旋

伏旋見經陽城縣散為澤潞是為陽城淀下流注

於唐河今源流多淤

方輿紀要

唐池 在唐縣西南

唐縣城西有一水導源盧奴縣之西北泉湧而出
東流至唐城西北隅竭而為湖俗謂之唐池蓮荷

被水勝遊多萃其上

水經注

龍池 在完縣北四十里其水可灌溉居民使之

海子淀 在新城縣東三十五里受紫泉斗門兩窪之水舊有小溝䟽淀東注淺狹易淤又黑洋淀在

縣東南五十里

牙家港 在安州西北三里與朱家港白洋淀接

茅兒灣 在雄縣東四十里上接紫禾淀下通保定

縣玉帶河為諸水經流要口

陽城淀 在慶都東南今涇

博水至陽城縣散為澤渚世謂之陽城淀

水經注

陽城淀在望都縣東南

元和志

馬務淀 亦名馬草淀在雄縣東三十里又蒼耳淀
綠鬚淀亦在雄縣境

紫禾淀 在雄縣東南十里白溝長流高陽諸河胥
匯於此

蓮花淀 在雄縣西南十里新安高陽諸水所匯也

相近有石曰淀又縣西十里有留通淀燒車淀皆方二十餘里

臺河淀 在雄縣北又縣北有襄子淀接新城界又縣東南有五官淀接任邱縣界

劉家淀 在安州西二十里石橋一畝諸水所匯也北流接依城河又菱子淀在州東三十里自唐滋沙三河分流入白洋淀

大滂淀 在高陽縣東馬家河所潴也周圍二十里

又縣西南十里有延福淀接蠡縣界又縣東北有馬棚淀宋監馬棚牧地也

白洋淀 在新安縣南二十里周六十餘里南高陽西安州東任邱北新安四處環之而新安十數村居其中

白洋淀安州高陽任邱新安諸水俱匯流於此下達四角河

輿圖

雜淀 在新安縣西五里又縣南有杜家淀縣東有

鴨園淀楊家淀王家淀皆與白洋淀相通

按舊志雜淀爲雹河蘆草灣水所瀦蘆草灣乃
九河外水其外更猛於九河蓋九河有道可循
此則四散瀰漫也

大澱淀 在新安縣西北五里卽古大渥澱也

本朝雍正四年疏渠洩水營田數千頃爲膏腴之地

渥水上承二陂於容城縣東南謂之大渥澱小渥

澱水南流注易水謂之渥同口

水經注

殷家淀 在新安縣東三里卽小渥澱也

督亢陂 在新安縣界

梁門陂 在安肅縣北

易水東分爲梁門陂陂水北接范陽陂

水經注

范陽陂 在定興縣南

范陽陂在范陽城西十里方一十五里俗亦謂之

鹽臺陂

水經注

縣西南五十里閭臺之西有狼兒淀地形窪下卽

山之水渚焉蓋卽古鹽臺陂

舊志

邊吳泊 在安州西南亦曰邊吳淀今湮

邊吳泊亦曰邊吳淀九河合流溢而為泊城南舊

有邊吳塔又有古堤在州城北東自邊吳村而下

接雄縣南自板橋而下接蠡縣皆以防九河之決

溢今廢

方輿紀要

廣利渠 在唐縣西南金太和六年所開引唐水灌

田數千畝又導而東以溉隣邑明萬歷中知縣楊

一桂復浚之建九閘以時蓄洩又於電水村架木
為槽以過水號為騰橋凡濬渠七十里歷村落三
十有八分析閘渠二十有五溉田無算

黃黑泉與龍泉水合流遶為城濠隆冬不冰人謂

其中有溫泉云

名勝志

黃溝窪 在清苑縣東一畝石橋諸水所潴也又草
橋窪史家窪亦在縣東

高橋窪 在新城縣南二十里高橋河故道也水集

金史卷之二十一
卷二十一
為患相近有泗莊東西窪與高橋相連

冷水溝 在滿城縣東十五里發源賈村東下流漸盛可引以灌溉南流會於清苑河

柳灣 卽蘆草灣在安肅縣東北十里宋遼分界處
柳灘 在安州東南三十里白洋淀西堤與浦口趙口陶口相連

龍潭 有二一在高陽縣東南四十里一在高陽縣南二里沙窩

一畝泉 在府西三十里一名尚泉其流與雞距泉合

雞距泉 亦在府西三十里泉水噴流狀似雞距與一畝泉合

按明統志及方輿紀要元張柔作新渠鑿西城以入水水循市東行轉北別為東流垂及東城又折而西雙流交貫由北水門而出是即清苑河上流也今清苑河繞城東轉市河久廢

浴丹泉 在唐縣葛洪山後相傳為葛洪浴丹處

曲家泉 在慶都縣西半里東流直入隍中又縣西

有湧魚西堤諸泉

詳龍泉河

黃黑泉 在慶都縣北里許二泉相去僅十餘步其

色分明不溷

古溝 在容城縣北門外其西有村名曰溝西白河

水溢逕村西直抵城下由溝北洩東入新安白洋

淀

啞溝 在完縣西北由唐縣孤山流逕縣界又東北入完縣界今湮

蘭溝 在定興縣東南四十里相傳范陽有五溝青白藍紅黃此卽藍溝也青溝在清苑縣東

雙井 在府治西二井並鑿相離尺許一苦一甘
聖井 在定興縣固城鎮

固城鎮土井泛溢為民患元總管萬戶張柔淘井獲大士像有淨水瓶一至今泉雖溢不踰其限因

名聖井

名勝志

善利井 在唐縣西一名天王井

八角井 在深澤縣西一名龍泉井大旱不竭

靈井 在唐縣西北

靈井隋圖經云唐縣中山城西北有一大井俗呼
趨母井昔云醇酎千日即井水所醞後以石蓋之
人不敢開齊刺史博陵崔濟欲開之有雲霧隱起

即蔽之

寰宇記

傾井 在東鹿縣西南明統志云漢光武師行過此
渴甚井自傾不煩綆溢居人以繩測之水隨欹側
為淺深

河間府

衛河 卽運河自山東武城縣經恩縣境入本府故
城縣南繞城而東入山東德州界又東北逕本府
景州東又東北逕吳橋縣西又東北逕東光縣西
又東北逕交河縣東又東北逕泊頭鎮入天津府

南皮縣界

按衛河卽古清河隋永濟渠也詳見大名府志

故城縣衛河在城南自山東武城縣北流逕恩縣境入縣界繞城而東入德州界 景州河在州東十里自德州流入又東北逕吳橋縣境入東光縣界 吳橋縣河在縣西三十里與德州接界 東

光縣河在縣西三里東北入南皮境

方輿紀要

故城縣河道北自恩縣界起南至武城縣界止計長一十六里 景州河道西岸北自吳橋縣界起

南至山東德州界止計程二十四里 吳橋縣河
道北自東光縣界起西岸南至景州界止東岸南
至山東德州界止計程四十二里 東光縣河道
西岸北自交河縣界起東岸北自南皮縣界起南
至吳橋縣界止計程六十里 交河縣河道北自天
津衛界起南至東光縣界止計長八十二里
治河要覽
滹沱河 其上流合漳滏諸水亦謂之胡盧河自深
州武強縣流至獻縣城南曰完固口分而為二一

西南由單家橋入交河縣又東至青縣鮑家嘴入
衛河一西北由臧家橋至河間縣龍華橋又北逕
順天府大城縣為子牙河歸三角淀

滹沱偕漳滏諸流共由武強入獻縣完固口復為
兩支一由西南入單家橋至鮑家嘴歸運一由西
北入臧家橋歷河間大城為子牙河出王家口歸
淀

許汝霖北河
聖功頌序

漳滏合流至冀州與滹沱合至獻縣分而為二一

由單家橋六十里至淮鎮又四十里至高川俱獻
縣境又六十里至滄州之杜梨木又五十里至交
河縣界又二十里至青縣入運河一由臧家橋六
十里至河間縣之沙河橋又六十里至河間縣之
龍花橋又六十里至大城縣為子牙河

磁州志

漳河 此自山東邱縣東北行之一支所謂老漳河
也由冀州棗強縣流經故城縣西又東北經景州
之北阜城縣之東與冀州武邑縣連界又東北逕

交河縣南又東北入天津府青縣界

詳廣平府

劉麟河 在阜城縣北七里北接冀州棗強縣之索

盧河東至交河縣合於漳河

阜城縣劉麟河在縣北七里劉豫阜城人也其子

麟嘗渡此而名有黃盧河自冀州棗強縣東北來

注之入交河縣界注於洺河 交河縣洺河在縣

南五里即阜城縣之漳河

方輿紀要

四角河 在任邱縣西北五十七里其北接高陽河

卽沙滋滙三水下流也自保定府之祁州博野蠡縣高陽新安至雄縣由蓮花淀而入其西接長流河卽徐電諸水下流也自保定府之安州新安由四女河而入其南接白溝河之支流自保定府之容城縣分岔歷雄縣新安由燒車淀而入三河合流而東過趙北口由柴禾淀入順天府保定縣界為玉帶河

鏡河 在任邱縣南舊時滋沙滙諸水溢於肅寧縣

境為中堡河又東為玉帶河入任縣界為鏡河又東北入蓮花淀今多淤塞

肅寧縣中堡河在縣東北三十里保定府蠡縣以東高陽以南之水溢入縣境為中堡河又東分流為玉帶河任邱縣境河上源即肅寧之玉帶河也流經縣南八里又北至縣南三里會蓮花泊

方輿

紀要

按保定河間二府舊志滋沙滙之水舊自蠡縣

引流而東歷肅寧之五千淀而達於雄縣之瓦
濟河中堡玉帶二河皆其經流處也後自蠡縣
北入高陽歷新安雄縣而出任邱之趙北口於
是故道多湮而玉帶河之名亦移於順天府之
保定縣矣

清河 在交河縣西二十五里漳水支流也自縣西
南界北流逕富莊驛又東逕縣東北六十里張家
橋又東五里散流入於滹沱俗名清頭河亦名運

糧河相傳五代梁時趙王鎔於此運糧以餉晉師
故名又李村河俗名土河亦自漳水分流經縣東
北四十里李村橋又東合於清河

倒流河 在交河縣東北九十里縣東境之水滙流
於此西行四十里注於滹沱故曰倒流亦名蔡河
平成河 在交河縣東北八十里一名陽氣寺古河
蛤螺河 在交河縣北二十五里下流入滹沱河
土河 在寧津縣南二十五里其上流自山東德州

逕德平縣西北流入境內相傳卽古篤馬河水經
篤馬河東北逕般縣故城西漢般縣在今德平之
北正寧津南界也又東流入山東樂陵縣界又有
遲河流河俱在縣東四十里至楊盤店西入於土
河謂之三渡口

谷家河 在寧津縣北二十里其上源卽吳橋縣之
龍灣也東流逕縣界又東入於土河

夾河 在吳橋縣東北十五里二水中分故名

索盧河 一名黃瀘河亦名枯河在故城西南五十里南經冀州棗強縣界又北入阜城縣劉麟河其水無源數年一至遇泛濫則波濤洶湧從流而下旱輟涸民播種其中收穫倍利或曰卽衛河之支流也

大河故道 在府境

按西漢以前大河由景州而入吳橋水經大河故瀆北逕舊縣故城東又北逕安陵縣西舊縣

即景州安陵今吳橋縣之安陵鄉也自是而東則合漳水而歷東光縣界水經注大河故瀆東北至東光縣故城西而北與漳水合東光故城在今縣東過此而北則合衛河而歷滄州界水經注衛漳東北入清河謂之合口今滄州西有合口鎮卽其處也東漢以後河由千乘入海故道遂為漳衛所占至宋仁宗時河復由此宋史河渠志皇祐元年河合永濟渠註乾寧軍入海

謂之北流永濟渠卽衛河乾寧軍卽青縣今故城景州吳橋交河東光諸州縣界中衛河所經皆宋時大河北流之道也又河渠志熙寧元年河溢樂壽埽樂壽今獻縣也元豐五年河溢阜城下埽二邑去衛甚遠而亦被河之患者蓋其時河流橫決南合於衛北又溢於漳也至金明昌五年河決陽武東注壽張而瀛滄之界不復有黃河矣

鳴犢河故道 在景州西南

元帝永光五年河決清河靈鳴犢口

漢書溝洫志

河水自靈縣別出為鳴犢河東逕鄒縣城北東北

合大河故瀆

水經注

張甲河故道 在景州故城界

張甲右瀆東北逕廣川縣故城西又東逕棘津亭

南又東北至蓆縣東會清河

水經注

屯氏北瀆 在寧津縣界

屯氏別河北瀆東逕重平縣故城南

水經

澠水舊瀆 在河間任邱二縣界

澠水東北逕依城北卽古葛城也又東北逕阿縣

故城東又東北至長城注於易

水經注

澠水在府城西自安州高陽流經此又北流入任

邱縣界合於易水

方輿紀要

高河舊瀆 在河間縣西南交河縣西北

高河自高陽縣流入府境東南流至交河縣合於

滹沱明志交河縣以高河滹沱合流而名

方輿紀要

易水舊瀆 在任邱縣西北

易水自易縣東逕鄭縣故城北又東至文安

水經注

易水在鄭縣北三十里東入文安界合滹沱

寰宇記

濡水舊瀆 在任邱縣西北

濡水自高陽東北至鄭入易

春秋杜預註

濡水歷安州屈高陽關過鄭州

任邱縣志

白洋淀 在任邱縣西北五十里關城村與安州高

陽新安接界衆流所匯深廣四通芰荷交匝望之
如江湖焉又凡察淀在縣西北三十里前堂後堂
二淀俱在縣西北四十里北花淀在縣西北四十
二里池魚絲窩二淀俱在縣西北五十里光淀在
縣西北五十里龍王淀在縣西北六十里

洋東五千二淀俱在肅寧縣東南三十里舊時鐵燈
竿諸水散流所匯今湮

五官淀舊名武湫淀在任邱縣東北三十五里舊

時鐵燈竿之水由此而東入於柴禾淀今湮又三
許淀在縣東北十三里今亦淤

掘鯉淀 在任邱縣北

掘鯉淀在鄭縣北二十里俗名掘柳淀

寰宇記

狐狸淀 在任邱縣西北

淀中有蒲柳多葭葦

寰宇記

蓮花泊 在任邱縣南三里荷香十里柳陰交匝為
邑勝地又齊家泊亦在縣城南

古長豐渠 有二皆在河間縣

瀛州河間西北百里有長豐渠貞觀二十一年刺史朱潭開又西南五里亦有長豐渠開元二十五年刺史盧暉自東城平舒引滹沱東入淇通漕漑

田五百餘頃

唐書地理志

通利渠 在任邱縣南五里亦名魚君陂唐開元四年縣令魚思賢開以洩淀水得地二百餘頃

永清渠 在東光縣西其深莫測漸平

沙溪 在故城縣西北二十五里一名南河其水無源秋雨後一望汪洋春至即涸

孟港 亦名柳行港在故城縣東二里漳水決入處也自縣北達景州西為青草河又東北注於千頃窪

龍灣 在吳橋縣東二十里淺深斷續流行東注寧津縣為谷家河

房淵 在獻縣北寰宇記樂壽縣房淵方三百里今

湮

張大窪 在交河縣東三十里爲鍾水之處明萬歷十七年知縣馬中良開溝五道以通絳河窪旁之田始無水患又達達窪在縣東北七十里又窪東窪在縣東北九十里

千頃窪 在景州東北三十里其地卑衍舊爲鍾水處

明宣德中大河北決自德州潰入境內知州劉深

開渠導入此窪水患遂息

方輿紀要

白草窪 在吳橋縣西南三十里又曹家窪在城西

十里梅家窪在城東北三十里

五龍潭 在任邱縣北十里春夏不溢秋冬不竭又

白龍潭在縣西十八里

龍潭 在寧津縣西北三十里水深莫測相傳有龍

窟故名

百道口 在府城西南

河間縣大廉陂下注滹沱其決入之處謂之百道

口寰宇記

鐵燈竿故瀆 在府西南

府境有鐵燈竿水其上流自武強饒陽之境滙漳
河滹沱諸流又北接博野蠡縣沙滏諸河下流潞
為陂池紆迴散漫經府境而北通靜海直沽以達
海其支流環繞郡城每遇夏秋水發一望無際

方輿

紀要

靳河故瀆 在東光縣南二十里唐開元中開今湮

完固口 在獻縣西南十八里滹沱偕漳滏諸流至

此分為二支一西南歸運一西北為子牙河

詳前
滹沱

趙北口 在任邱縣北五十里亦曰趙堡口衆水所

匯中駕長橋通南北孔道

下口 在東光縣北二十里

衛河有大小龍灣縈迴而下經縣北二十里其地

名下口

方輿
紀要

福井 在河間縣治西南相傳為唐大歷中鑿明正德時湮塞後縣尹牛象坤尋故址復濬因名其地曰福井巷有任彥藥碑記

天津府

衛河 卽運河自河間府交河縣流逕南皮縣西又東北逕滄州城西又東北逕青縣南合滹沱河又東北逕靜海縣又東北逕天津縣北又東與白河會三岔河

南皮縣衛河在縣西二十里與交河縣接界 滄

州河在城西其上游自南皮縣流入又東北入興

濟縣界 青縣河在城東一里自興濟縣流入境

合滹沱河 靜海縣河在縣城西北自青縣合滹

沱河流入境至小直沽與白河會

方輿
紀要

天津運河北自武清縣交界三岔河起南至東岸

南皮縣西岸交河縣界止歷天津靜海青縣滄州

共計程三百四十五里

治河
要覽

金方輿記卷二十二
漳沱河 自河間府獻縣分流經交河縣抵青縣南
七十里杜林鎮與漳河會

漳河 亦自河間府交河縣來至杜林鎮與漳沱合
流至青縣南二里鮑家嘴合於衛河其合處曰岔
河口亦曰汭河口水勢洶湧濶數十丈

按漳沱自獻縣分流一由大城為子牙河卽漢
志所云從河東至文安入海者此正流也一至
青縣杜林鎮合漳河卽水經注所云衛漳東北

左會滹沱別河故瀆謂之合口者此支流也近
志以子牙為滹沱之別支而杜林鎮之別瀆反
謂之正流誤矣漳河自山東邱縣分流一北行
至冀州合滹沱所謂新漳河也一東行至青縣
合滹沱所謂老漳河也滹沱衝啗於恒晉至冀
州合漳而渾濤益怒蓋水之勢合則猛也漳河
潰溢於洺瀛至青縣合滹沱而安行赴海蓋水
之性就下而順也昔禹播九河於大陸之北而

同逆河於渤海之間因地宜亦順水性也

三岔河 在天津縣東北本名三岔口亦名三岔沽
衛河西南自靜海來逕縣北而東其流濁白河西北
自順天府武清縣來亦逕縣北而東其流清各流
至縣東北二百步許而合流謂之三岔河又東南
出直沽注於海

減水河 有二一自順天府武清縣楊村北流至天
津縣東南張家嘴入直沽此洩潞河之水者也

一自滄州南流至天津縣大直沽渡入直沽此洩
衛河之水者也

清河 在青縣西南五十里其相近又有湛河泗河
共三河皆無源為交河縣雨潦洩水之渠北至杈
河口南二十里魚兒莊注於南淀

黑龍港河 在青縣西十五里又馬家橋河在縣西
八里胡家店河在縣西十里以上三河至縣北十
五里空城村匯而為一至大城縣入子牙河

鹽河 在靜海縣西自河間府河間縣流經此與順天府大城縣分界卽子牙河也

浮河 在滄州東南五十四里自河間府東光縣東北流逕州界又東逕鹽山縣東入於海

浮河自東光縣永厚渠分流東北逕滄州南十里又東北逕州東一里又東北入海

寰宇記

浮河在舊城南十里東北入海漢於此置縣以在浮水之陽故名浮陽

滄州志

浮河在縣東百里自滄州界入縣境達海

鹽山縣志

九女河 在滄州東七十里相傳有劉氏九女塋此

因名

獻河 在慶雲縣南三十里一名陷河卽河間府寧津縣土河之下流經山東樂陵縣流入縣西北境之水多滙於此又東經山東海豐縣注於海

無棣縣有陷河濶數里西通德棣東至海

齊乘

陷

河至樂陵縣分南北二派南派入雷化北派由慶

雲入海豐馬谷山前抵土河口入海

山東通志

鬲河 在慶雲縣南卽九河之鬲津也

詳九河故道

紀家河 在慶雲縣南五里又义河在縣南三里下

流俱注於鬲河

胡蘇河 在慶雲縣西南十二里此亦九河之一也

詳後故道

直沽 在天津縣東南衛河白河丁字沽之水匯流

於此又東南注於海

按今天津縣本名小直沽其南則衛河合南路
之水其北則白河合北路之水滙流於此明永
樂二年築城置衛

本朝雍正八年改設府治為京師東面襟喉之地其東
南十里為大直沽渡元史至元二十五年增立
直沽海運米倉是其處也地勢平行每遇霖潦
羣川汎溢直與海平故有直沽之名又東南四
十里為海口杜祐通典所云三會海口也

西沽 在天津縣東北自順天府武清縣納三角淀之水與白河會而入於直沽河形如丁字故又名

丁字沽

鹹水沽 在天津縣東南六十里卽古豆子航也自渤海至平原其間濱海之地土人多謂之豆子航

括地志

河間之豆子航今鹹水沽是也東去海四十里地

斥鹵廣數十里宋時置戍守於此

地理通釋

鹹水沽乃出海要地

河間府舊志

葛沽 在天津縣東六十里相近有大沽明天順初

開以通薊州運道者也亦曰新河

詳順天府

明月沽 在慶雲縣東北七十里東接馬谷山瀕海煮鹽處也

渤海 在天津縣東一百二十里京畿南北羣川悉由直沽以入其西南歷滄州鹽山而接山東之海豐縣界其東北歷青縣靜海而達於順天府之

寶坻縣界元時江淮漕運悉行海道以抵直沽明永樂初亦行之自會通河成始罷

海運之道自平江劉家港入海至崇明三沙放洋向東行入黑水大洋取成山轉西至劉家島又至登州沙門島於萊州大洋入界河當舟行風信有時自浙西至京師不過旬日而已

元史食貨志

明初海運仍元故道自會通河成報罷

盧傳印海運攷

天津去海不過百里風帆馳驟遠自閩浙近自

登遼皆旬日可達控扼襟要第一形勝處也

方輿紀要

大河故道 禹貢逆河入海之迹多不可攷不敢附會據
史志所載古大河之經府境者有二道一由河間府
東光縣歷南皮滄州青縣靜海而達於天津此為西
漢時大河入海之道亦卽北宋時河合永清渠北流
之道也水經注河水篇大河故瀆東北至東光縣故
城西而北與漳水會又淇水篇清河東至東光縣西
又東北右會大河故瀆則自東光而下漳衛所經

清河卽衛

水詳大名府

皆大河故道矣水經清河東北過南皮縣西又

東北經浮陽縣西南皮故縣在今治東北浮陽卽今滄州舊城也又水經濁漳水東北過章武縣西又東北過平舒縣南東入海今青縣靜海漢爲平舒章武二縣地而天津又章武濱海之區也蓋西漢以前河北經章武漳衛皆附之以達海新莽時河東徙千乘漳衛遂由其故道以達海自是而後河不由此者幾歷千年至宋皇祐元年河自澶州合永濟渠而北流入

海卽今運河所行之道也宋史河渠志黃御河帶
北行入獨流東巖經乾寧軍滄州等八砦邊界直
入大海其近海口濶六七百步深八九丈三女砦
以西濶三四百步深五六丈獨流巖卽寰宇記所
云獨流口在靜海縣北三女砦卽今之三河砦在
靜海縣東乾寧軍今青縣海口今直沽入海之處
也一由河間府寧津縣經南皮之東歷鹽山慶
雲而達於山東之海豐是為北宋時二股河東流

之故道宋史河渠志嘉祐八年河流派別於魏之第六埽遂為二股自魏恩東至德滄入於海是謂東流蓋其時以合永清渠者為北流故此又有東流之目也河間府志寧津縣古黃河堤在縣西三十里東北入南皮界慶雲縣志古黃河自南皮由鹽山孟家店至慶雲縣黑牛王店又東逕海豐境達於海寧津卽宋臨津地界德州南皮鹽山宋俱屬滄州慶雲海豐為宋滄州之無隸縣是則志所

云古黃河者蓋卽宋史所云德滄之東流也宋史
又云神宗熙寧二年從宋昌言開濬二股於是東
流盛而北流閉元豐四年河復注於御河於是北
流盛而東流閉哲宗元符二年河大決於內黃於
是併勢北行而東流遂絕計嘉祐八年為歲癸卯
元符二年為歲己卯東流所注不及四十年而近
有指此為禹河故迹者遂以海豐之馬谷山為碣石
語多不經甚至目鄺善長蔡九峰為南產不知北

地高下九峯固是南人而善長之居范陽則魏書
有明文豈竟未之見耶

九河故道 九河之不可攷久矣爾雅釋水徒駭太
史馬頗覆釜胡蘇簡潔鈎盤鬲津九河皆禹所名
也孔氏尚書傳依其次而序之朱子孟子集註亦
宗其說至於故道所在不可得而詳也春秋緯寶
乾圖云齊呂填八流以自廣尚書中候亦云自齊
桓公塞之蔡沈以為此無稽之言也漢書溝洫志

成帝時河堤都尉許商言古記九河之名有徒駭
胡蘇鬲津今現在成平東光鬲界中自鬲以北至
徒駭間相去二百餘里新莽時御史韓牧言可畧
於禹貢九河處穿之縱不能為九但為四五亦有
益夫漢世近古諸儒考據精博緯圖中候非盡無
徵至許商以奉命行視圖方畧韓牧亦以能治河
徵而或止得其三或僅求其四五則其餘之湮滅
可知也唐宋以後去古寔遠舊迹日湮而杜祐通

典李吉甫元和志歐陽志輿地廣記樂史太平寰
宇記於徒駭胡蘇鬲之外又得馬頰鉤盤覆釜簡
潔四河惟太史未詳所在千年以前求之而不得
千年以後竟一一犁然有其處所此可信乎抑不
可信乎蔡沈曰或新河而載以舊名或一地而互
為兩說皆似而非無所依據斯言誠是然據許商
所云三河既實有其地而孔穎達亦云九河之次
自北而南既知三河之處則其餘六者當亦在成

平東光鬲縣之南北今攷河間府交河縣東有成
平故城東光縣東有東光故城山東德州北有鬲
縣故城皆漢縣也川原平行沮洳盈望九河舊迹
要亦不離此域然或為平疇或存枯瀆無論禹時
故道不可復問即漢世所為三河者亦在有無斷
續之間矣因備列九河之目叅以衆說而詳辨於
後

徒駭尚書疏李巡曰徒駭者禹疏九河以徒衆起

孫炎曰禹疏九河用功雖廣衆懼不成故曰徒駭
漢書注師古曰徒駭在成平唐書地理志清池西
五十里有徒駭河西堤寰宇記徒駭河與清池相
接清池今滄州也與交河相去七十餘里河蓋由
交河而入滄州也漢書地理志成平有滹沱河民
曰徒駭于欽齊乘河昔北流衡漳注之河既東徙
漳自入海安知北流之漳非古徒駭夫漳與滹沱
為并冀大川不得強以九河之名被之但自大河

東徙而二川北溢或竟潰入徒駭之中正未可知
間竊為之斷曰徒駭非漳潯沱也漳潯沱之經行
於瀛滄界者卽徒駭故道也

太史尚書疏李巡曰禹大使徒衆通其水道故曰
太史郭璞曰太史今所在未詳明李賢一統志太
史河在南皮縣治北于欽齊乘清滄二州之間有
古河堤岸數重太史等河當在其處自漢以上未
知所在而忽得之于欽李賢其說自不足據

馬頰尚書疏李巡曰河勢上廣下狹狀如馬頰也
明一統志馬頰河在東光縣界蓋九河之次自北
而南以地計之當在東光境內李賢之說似為得
之寰宇記篤馬河卽古馬頰河篤馬在九河之南
許商有明言何不一攷耶樂史蓋誤認唐之馬頰
為古之馬頰耳元和志馬頰河在安德縣南五十
里平昌縣南十里久視二年開決亦名新河蓋此
卽漢之篤馬河水經所云東北逕安德縣故城又

東北逕平昌縣故城北者也故瀆久湮唐復開名
爲馬頰所謂新河而被以舊名者也樂史不辨元
和志新河二字之義而指爲九河之一紕謬甚矣
覆鬴尚書疏李巡曰水中多渚往往而虛形如覆
釜通典安德縣有覆鬴河安德故城在今山東陵
縣德平界與河間府之寧津相近而河間府志云
覆釜河在南皮縣東南滄州志又云河在慶雲縣
南意覆鬴自陵縣歷寧津南皮而達慶雲乎不敢

強為之說也

胡蘇尚書疏李巡曰其水下流故曰胡蘇胡下也
蘇流也孫炎曰水流多散胡蘇然漢書地理志東
光有胡蘇亭元和志胡蘇河在饒安縣西五十里
寰宇記胡蘇河一名赤河其水赤渾色自臨津流
逕饒安無棣入海齊乘滄州之南有大連澱西踰
東光東至海非胡蘇河歟滄州志胡蘇河在慶雲
縣西南十二里按今滄州卽唐饒安慶雲卽唐宋

無棣寧津即漢東光宋為臨津縣今其縣西有胡蘇亭正班固所云在東光者也寰宇記之言近之矣

簡尚書疏李巡曰簡大也其水深而大也郭璞曰水道簡易史記正義簡在貝州歷亭縣按歷亭今山東東昌府恩縣也若簡河在此則出鬲津之南矣謬甚齊乘滄州大連澱南至西無棣縣有曰大河曰沙河皆瀕古堤茲非簡潔等河歟河間府志

簡河在慶雲縣南三十里二說差近

潔尚書疏李巡曰河水多山石治之苦潔潔苦也
郭璞曰水多約潔金史地理志南皮縣有潔河未
知何據按簡之與潔本屬二河爾雅明列為九漢
晉唐宋諸儒紀載相仍蔡傳獨宗歐陽忞之說而
合之為一未免穿鑿

鈎盤尚書疏李巡曰言河水曲如鈎屈折如盤也
後漢書初平二年公孫瓚破黃巾於槃河水經注

篤馬河故渠川派東入般縣為槃河蓋亦九河之一也通典右鈎槃河在樂陵縣東南元和志在陽信縣北四十里寰宇記在樂陵縣東南五十里從德州平昌來金史地理志將陵縣有鈎盤河慶雲縣志鈎盤河在縣西南自德平西北樂陵東南經慶雲南由海豐霑化至九山入海九河自鬲津而外此河源委尚為有據

鬲津尚書疏李巡曰河水狹小可鬲以為津也漢

書地理志平原郡鬲平當以為鬲津按漢鬲縣故
城在今山東陵縣西陵縣唐安德也元和志鬲津
枯河在縣南七十里則鬲津實導源於此又東逕
吳橋縣南河間府志古鬲津河在吳橋南亦名吳
川又東逕寧津縣南縣志鬲津河在縣南又東逕
南皮縣南與山東樂陵分水寰宇記樂陵縣鬲津
枯河在縣西三里南皮縣志河在縣東南四十五
里又東逕慶雲縣南慶雲舊無隸也金史地理

志無棣有鬲津河又東北逕鹽山縣東南縣志河
自慶雲北入鹽山界崔家口又東逕海豐入海鬲
津之流最長史志亦多可攷故詳序之

無棣河故道 在滄州及南皮鹽山慶雲之南亦名
無棣溝

清河自東光又東北無棣溝出焉東逕南皮縣故
城南又東逕樂亭北又東逕新鄉城北又東分為
二瀆又東逕樂陵郡北又東屈而北入又東轉逕

宛鄉故城南又東南逕高城縣故城南與枝瀆合
瀆上承無棣溝南逕樂陵郡西又東南逕千童縣
故城東枝瀆又東南屈東北注無棣溝無棣溝又
東北逕鹽山東北入海

水經注

滄州清池西南五十七里有無棣河開元十六年
開無棣有無棣溝通海

唐書地理志

明溝河故瀆 在滄州西又陽通河故瀆在州東南
滄州清池西四十五里有明溝河堤東南十五里

有陽通河

唐書地理志

毛河故瀆

在滄州南

南皮古毛河自臨津逕縣入清池

唐書地理志

毛河在清池縣西南又東入鹽山界

寰宇記

按毛河卽屯氏之訛也漢書注師古曰屯音大
門反而隋室分析州縣誤以為毛氏乃置毛州
失之甚矣

塌河淀

在天津縣東北四十里

大連淀 在滄州齊乘滄州南有大連淀詳見九河
故道又唐書地理志清池西五十里有李漏淀宋
史河渠志滄州北舊有三堂漏今皆無攷

西漏 在青縣東南東西橫亘凡十餘里南北二十
餘里秋水四至一望無際

薩摩陂 在滄州北

陂在長蘆縣北十五里周五十里有蒲魚之利

元和

志

古平魯渠 在滄州北

渠在魯城縣郭內魏武北伐時所開

元和志

劉公渠 在鹽山南五十里

渠舊承無棣溝下流大小羣川悉附入海無棣溝
塞每患泛溢明萬歷四十二年知縣劉子誠自縣
西南開渠至縣東南四十里高家灣由古黃河道

入海

鹽山縣志

盤古溝 在青縣南

乾寧軍有盤古溝水深三丈大旱不涸

九域志

青縣南十五里有盤古溝深三丈東流入於衛水

濟運

治河要覽

忤清池 在滄州東南

清池縣舊有大連澱後魏延興二年澱水泛溢破

忤清村因渚為池水澄味鹹未嘗枯涸

寰宇記

忤清池今日大梁五龍堂元至元丁亥重濬

齊乘

尹兒灣 在天津縣東明永樂六年命陳瑄總督海

運因創百萬倉於直沽尹兒灣築城置衛今去城八里有運糧河舊自海口達尹兒灣之運路也

黑龍灣 在鹽山縣南十八里夏秋積水成川

獨流淺 在青縣北卽宋獨流口也黃御支流經此而北亦曰獨流河今其地多蒲葦之利

黃御支流自興濟縣北流逕縣境謂之獨流河卽九域志乾寧軍北之獨流口也舊時河流甚盛其後黃御分流遂致淺塞

方輿紀要

馬家口 在天津縣東南洩南淀之水又寇家口在

州南十里許通水淀之利

郎兒口 在滄州南四十里

延祐四年開郎兒口決積水由滄州城北川達於

海

元史河渠志

州南有大堤亘五十里東為滄州境西為南皮境若衛河水漲西境為患特甚元大定以來屯軍士民爭訟不決乃以公移開掘截然中段約二十餘

大水由中流名郎兒口州縣各立碑堤上

河間府志

八會口 在慶雲縣北

水流交會處也滄州南境之水至此入於陷河

方輿

紀要

毛公井 在舊滄州城內

清池有甘井開元二十年令毛某母老苦水鹹無

以養縣舍穿地泉湧而甘民謂之毛公井


唐書地理志

寒水井 在南皮縣西

南皮縣寒水井在縣西一里魏文帝與吳質書憶昔南皮之游浮甘瓜於清泉沈朱李於寒水卽此

井是也

寰宇記



畿輔通志卷二十二

欽定四庫全書

史部

畿輔通志卷二十三

詳校官監察御史_臣劉人春

檢討_臣德生覆勘

總校官進士_臣繆琪

校對官中書_臣孫球

謄錄監生_臣郭履元

欽定四庫全書

畿輔通志卷二十三

川

正定府

滹沱河 在府城南八里源出山西繁峙縣泰戲山
由雁門縣流入平山縣東經靈壽縣抵府城南又
東經藁城縣北又東經晉州城南又東入保定府
東鹿縣

按滹沱之源昉於山海經

秦戲之山滹沱水出焉

其名見

於周禮

職方氏并州其川滹沱

禮記

晉人將有事於河戰必先有事於滹沱戰

國策

趙攻中山以擅滹沱蘇秦說燕王曰燕南有滹沱

諸書而桑欽水

經獨無其目濁漳巨馬篇中所見不過一二語

班固漢書地理志代郡鹵城

滹沱河東至參合入滹沱別過郡九

行千二百

常山郡靈壽

禹貢衛水出東北東入滹沱

南行唐

滋水東至新市入滹沱

信都國信都

故滹沱在北東入海

渤海郡平

成

滹沱河民曰徒駭河

河間府樂城

滹沱別水首受滹沱河東至東光入滹沱

河弓高

溥沱別水首受溥沱
河東至平舒入海

皆有之而源委究

未悉今據元和志寰宇記所載溥沱發源之處
及所經之地詳列於後元明以來若元史河
渠志顧祖禹方輿紀要陸隴其畿輔地圖記亦
節錄備考

代州繁峙縣泰戲山一名武夫山在縣東九十里
溥沱水出焉 唐林縣水在縣東 崞縣水在縣
東二百步 忻州秀容水在縣東三十二里 定

襄水西自秀容縣流入 太原孟縣水西自代州
五臺縣流入南去縣百里 恒州靈壽縣水在縣
西南二十里 正定縣水南去縣一里 九門縣
水在縣西九十里 藁城水去縣二十九里 鼓
城水在縣北十三里 定州深澤水在縣南二十
五里 魚極水南去縣二十五里 深州鹿城水
在縣西北四十二里 安平水在縣南二十三里
饒陽水北去縣四十五里

元和志

代州繁峙縣滹沱河源出縣東南孤阜山東北入
恒山界 唐林縣水在縣東 崞縣水在縣東二
百步 忻州秀容縣滹沱南歷忻中口俯會忻州
水 定襄縣水西自秀容縣流入 雁門縣水在
縣南 五臺縣水東流經聖人阜 并州孟縣滹
沱河自代州五臺縣流入南去縣百里 鎮州靈
壽縣河在縣西南二十里 正定縣河在縣北一
里 九門縣河在縣北四十九里 藁城縣河在

縣東二十九里 鼓城縣河在縣北十三里 東
鹿縣河在縣西北四十五里 深州安平縣河在
縣南二十三里 饒陽縣河舊在縣南光武所渡
處魏武帝因饒河故瀆決令北注新溝所以在今
縣北後刺史楊貝改為清寧河是也 瀛州高陽
縣河在縣東北十四里 河間縣河在縣西二十
里 鄭州鄭縣河東流經縣南二里至莫金口東
北流入文安縣界 霸州大城縣河出縣北一百

三十里 文安縣河在縣西北三十里又東溢為

趙淀

太平寰宇記

滹沱河在正定路正定縣南一里經藁城縣北一

里平山縣北十里經靈壽縣西南二十里此河連

貫正定諸郡經流去處皆曰滹沱水也

元史河渠志

滹沱河源出山西繁峙縣東北百二十里泰戲山

自繁峙折而西南流經代州東南又西南經崞縣

忻州及定襄縣東復折而東南流經五臺縣南孟

縣北又東北入直隸正定府平山縣界經縣北又東經靈壽縣及正定府城南歷藁城縣北趨晉州城南繞保定府東東鹿縣南又過安平縣南達深州北復出饒陽縣北歷河間府獻縣南交河縣北入青縣界至縣東南岔河口合於衛河

方輿紀要

滹沱河在正定府南八里發源山西太原府繁峙縣由雁門流經直隸靈壽平山遶正定城南歷藁城晉州東鹿至冀州會漳滏二河過衡水武邑武

強至河間府獻縣為二支一東流為鹽河一南流

交河縣抵青縣岔河口入衛

陸隴其畿輔地圖記

滋河 在正定府東北三十里源出山西大同靈邱縣枚回山流經靈壽行唐抵正定境東入藁城縣北又東過無極縣又東入深澤縣

蔚州靈邱縣滋水出縣西枚回山懸流五丈湍激之聲響動山谷 正定縣水南去縣三十里行唐縣水北去縣二十六里

元和志

滋河水在府北三十里源出蔚州枚回嶺經靈壽縣入行唐縣之張茂村伏流不見至府境南孟社

復出東南入河間府

明一統志

滋河之源最多一出阜平白蛇嶺曰汧河一出山西五臺縣南山之南東流與汧河會一出靈壽縣界北山五岳寨一出王母山北峪一出王母山南峪俱至靈壽縣西北五河村五河合流東注至滋峪之東南又有西山之小河入焉故名滋水東返

行唐趨正定經藁城東北抵祁州與沙河合

行唐縣志

按漢書地理志滋水出行唐縣東至新市即入
滹沱經流無幾元和志又謂源出靈邱其來頗
遠明一統志謂水至行唐而伏其流亦微今行
唐縣志又謂自縣而上匯集衆流即成大川蓋
源流變遷今昔異矣

西韓河 在正定縣西二十里源出大鳴泉西南流
入滹沱

西韓河韓信伐趙時經此故名

方輿紀要

洙河 在獲鹿縣南其源有四一出蓮花營一出絳

北村又二泉出藥城縣竇嫗村之石牛港四水交

流逶迤自藥城合北沙河達於趙州常山郡石邑

井陘山洙水所出東南至屢陶入泚

漢書地理志

咸平五年河北漕臣景望開鎮州常山南河入洙

水以利漕

宋李燾長編

洙河在藥城縣西十二里元氏縣之沙河東北流

合馬又東南經趙州南下

方輿
紀要

北沙河 在獲鹿縣南源出元氏縣西山流經縣界之封龍山東至藥城與洹河合

金河 在獲鹿縣東南三十里源出井陘縣東流經縣界入元氏縣又東至藥城合於洹河明萬厯中河流堙塞知縣蘇繼歐修濬改名金水河

衛河 即禹貢恒衛既從之衛水源出靈壽縣東北東南入於滹沱

靈壽禹貢衛水出東北東入滹沱

漢書地理志

衛水在靈壽縣東北十里俗呼雷溝河源出恒山

禹貢恒衛既從即此

方輿紀要

衛水發源靈壽之良同村東南流四十里入滹沱

河

陸隴其畿輔地圖志

嵩陽河 一作松陽河在靈壽縣西南五里源出楸

山東南流入滹沱又淤泥河在縣東北二里亦曰

溫泉南流入嵩陽河居人資以灌溉

魏河 在元氏縣西南六里源出贊皇縣黃沙嶺東北流入縣界與泚水合又東入高邑縣境

槐水出贊皇縣黃石山本贊皇山別阜連元氏縣

界一曰渡水

寰宇記

槐水在元氏縣西南六里源出贊皇縣之黃沙嶺

東流經縣界又東歷高邑

方輿紀要

泚水流經縣西南六里合槐河

元氏縣志

泚水河 在元氏縣南源出封龍山流經縣西南六

里紙屯村合槐河入高邑縣界

泚水源出封龍山東南合流於槐水地名紙屯渡

口
方輿
紀要

按泚河有二此為北泚其南泚詳趙州

猪龍河 在元氏北八里源自山西流經縣界又東

至趙州合於洹河

冶河 在藥城縣北即古太白渠也源出山西平定

州之松嶺流經井陘縣合綿蔓水亦曰甘陶河又

東北經平山縣又東南流入藥城縣界後自平山縣城西決入滹沱今改流自平山經正定藥城達於洺水

冶河相傳即漢太白渠時遇水溢逆薪橫流入爭取之以供炊爨宋金間因以供陶冶之用故謂之

冶河

正定府志

冶河一名甘陶河源發山西平定州松嶺自娘子關流經井陘縣合綿蔓河流至本縣湍激之聲可

聞數里冬月不冰由城西北入滹沱河為兩河口

一清一濁如涇渭然

平山縣志

冶河在藥城縣西北舊時自平山縣流經此其後自平山縣東北流合於滹沱滹沱不能容決溢為患元至元末引冶河分流滹沱水勢遂殺數年下流湮塞仍決入滹沱皇慶初又議自平山縣西北改闢河道下至寧晉使冶水仍入舊河則滹沱勢分正定之害必少但藥城地形頗低擬於縣北聖

毋堂東治河東岸開減水河一道以殺其勢於是

治河復導流於此未幾復廢

方輿紀要

按漢志太白渠首受綿蔓水東南下至曲陽入
斯汶水經注綿蔓水又東謂之太白渠白渠水
又東謂之斯汶水是治河故道本與汶通自併
入滹沱決溢為患

今上雍正四年興修水利於治河入滹沱之處堅築大堤
以遏絕之引入汶河以適其性由是治河復循

故道而滹沱亦慶安瀾矣

旺婁河 在平山縣西十五里地暖泉溫隆冬不冰
居人於此造楮為業亦名望樓河

濺河 在平山縣北源出房山東南流入於滹沱

房山在平山縣西北濺水出焉東出行唐入博陵
謂之木刀溝又從此過石矲山南流入滹沱河

寰宇記

記

濺河在縣西北六十里流至縣北入滹沱河

平山縣志

派河 即沙河也在阜平縣南源自山西繁峙縣之
白坡頭口流經縣界又東南經定州之曲陽縣流
至行唐縣南又南入於新樂

阜平縣派河在縣北源自恒山流經大派小派二
山而南 行唐縣派河在縣西南東入新樂界方

紀要

沙水即派水發源山西太原府繁峙縣白坡頭口

流經直隸阜平曲陽行唐新樂

陸隴其畿輔地圖記

平陽河 在阜平縣東六十里發源太茂山南流入
派河又班峪河在縣東四十里發源本縣炭火鋪
流經縣東入派河又鷄子河源出山西靈邱縣亦
經縣東入派河又有小河在縣東關外發源大派
山南流入派河

胭脂河 在阜平縣西南五十里發源本縣清竿嶺
東流入派河水有紅色故名又當城河在縣西南
發源山西五臺縣流至縣南與胭脂河合流入派

河

兆流河 在阜平縣龍泉關外發源關西八里之印鈔石山下流至縣西北入派河

郃河 在行唐縣南一里源出縣西北兩嶺口山谷間曰潁水南行三十里經箕山之東許由村之南即所云洗耳溪也又東流曰郃河又東經新樂縣界入派河又縣西北三十五里有甘泉河源出甘泉廟南流入郃河

賈莊河 在行唐縣北二十里源出縣西北武莊社
北山曰曲河東流經賈莊村曰賈莊河又東入派
河

石白河 在行唐縣南

南行唐有石白谷

後漢書
郡國志

後漢永平中引石白滹沱河以通漕即此

方輿
紀要

浴河 在新樂縣南五里一名金水河源出縣西南
十五里中同村浴兒池東流分而為二一從西折

而南一從北折而東與木刀溝會曰三义河口與
晉州藁城接界

浴河在縣中聞村清溫可濯冬不凝冰

新樂縣志

雅兒河 在晉州東北十二里入東鹿縣涇槃集渚
沱支流也今涇

木刀溝 在新樂縣西南亦曰長淋溝自閔泉鎮東
南流至赤堆村與浴河會流經無極藁城二縣入
新樂縣木刀溝在縣西南二十四里溝傍人姓木

名刀因名

元和志

新樂縣長淋溝在縣南二十四里亦呼為木刀溝

寰宇

記

木刀溝源出閔泉鎮平地湧出流經路橋王村至

赤堠村與浴河合共行六十里

新樂縣河渠考

宿龍泓

在贊皇縣環山亭下即槐水發源

酈陽水

在藁城縣西南

藁之宜安南有酈陽水入之

水經注

宜安在城西南二十五里其西有泥陽村疑卽鄜

陽也水今涸

藁城縣志

響閘水 在正定縣城東南隅源自城河西北隅經此南出明萬厯四年知縣周應中用石甃砌流急有聲因懸水磨於此今廢閘外溉田數十頃

井陘水 在獲鹿縣西北一曰鹿泉水自井陘縣流入又東合綿蔓水

井陘山水世謂之鹿泉水東北流屈徑陳餘壘又

東注綿蔓水水經注鹿泉水一名陘水去石邑縣

十里

元和志

鹿泉水在獲鹿縣西即井陘山水世謂之鹿泉水

隋置鹿泉縣取此

正定府志

微水 在井陘縣東北二十五里南流入甘陶河

綿蔓水 在井陘縣南門外源自山西流經縣界合

甘陶河

綿蔓水上承挑水水出樂平郡之上艾縣東流東

經靖陽亭南故關城也及北流至井陘關下注澤
發水亂流東北經常山蒲吾縣西挑水南經蒲吾
縣故城西又東南流經桑中縣故城北又東南流經
綿蔓縣故城北自下通謂之綿蔓水

水經注

井陘縣綿蔓水在縣西南八十里韓信擊趙使萬
人先背水為陣信曰陷之死地而能生謂此水也

元和志

綿蔓水在井陘縣南門外發源山西平定州流至

縣界與甘淘河合

正定府志

忽忽水

在平山縣西一百里一作沕沕水

忽忽水自半山湧出達於平地灌田數十頃明正

德二年於水口建城置戍

方輿紀要

沕沕水泉出山半其聲沕沕傾瀉殆數十丈山高

流深源清泉冽冬夏不竭土人利之

平山縣志

濟水

在贊皇縣南流入高邑界

房山贊皇山石濟水所出東至屢陶入泚

漢書地理志

贊皇縣濟水出贊皇山西北流去縣南十里此別

是一濟水應劭以為四瀆誤也

元和志

贊皇縣濟水去縣十里即詩云出宿于濟是也

太平

寰宇

記

大唐渠 在獲鹿縣東北十里

獲鹿縣東北十里有大唐渠自平山至石邑引太

白渠灌田有禮教渠總章二年自石邑西北引太

白渠東流入正定界以灌田天寶二年又自石邑

引大唐渠東南流四十三里入太白渠

唐書地理志

大明川 在靈壽縣西北九十里

橫山嶺西團泊口東俗呼為錦繡大明川其地兩

山夾峙中有平原數十里多產花木故名

靈壽縣志

黑龍潭 在贊皇縣西七十里上有龍神廟

龍潭灣 在藥城縣西五里昔時治河支流也

聖水洼 在靈壽縣西北二十五里白石村其水冬

夏不竭

洗兒池 在新樂縣義臺後

義臺後有洗兒池相傳炎帝生於此

方輿紀要

蓮池 在靈壽縣晉州城北二里亦有蓮花池

靈壽縣西南之王覺村山水衝開一池其蓮特盛

不種而葩

名勝志

湯池 在阜平縣西八十里池水一溫一冷

養魚池 在靈壽縣

池在趙王城內武靈王故跡也

名勝志

飲馬池 在行唐縣東

池在縣東莊頭村相傳唐尉遲敬德留守時開鑿

飲馬處今池上有鄂國公廟

明一統志

恒陽第一泉 在正定城西門外迤南護城河中舊名甘泉甘冽異於他水

大鳴泉 在正定縣西北三十里即西韓河上源也有泉數十穴大者如車輪溉田百餘頃少東有小鳴泉又有鵬橋泉在縣西二十里源自大鳴泉凡

四五十穴明宣德初知縣李守義引水灌田萬厯
四年知縣周應中復濬又開三陽河俱由丁家橋
斜角頭李家莊入河溉田甚廣

涼樓坡泉 在正定縣北三里東南流為周河入滹
沱

旺泉 在正定縣東北隅大可數畝一支南流入城
河今廢一支西南流經西洋朱福屯等村明萬厯
初知縣周應中開濬大為民利

白雀泉 在正定縣西南三里斜角頭村之南相傳泉舊在白雀寺中故名

馬跑泉 在井陘縣東五十里頭泉村亦名頭泉相傳漢光武至此渴甚馬跑地泉出故名

蒙泉 在元氏縣封龍山半又有龍泉亦在封龍山河西泉 在平山縣西二十五里平地湧泉數處溉田數百頃

溫泉 有二一在阜平縣西三十五里清瑩如鑑一

在元氏縣西南八里紙屯村前居民賴之造紙即
泚水也

石乳龍泉 在贊皇縣障石巖上形如乳吐故名

白馬泉 在贊皇縣五馬上味甘美相傳東晉五
馬將軍遊畋渴甚馬足忽陷水湧出故名

野狐泉 在贊皇縣西南七十里泉水湧出遂成大
河通於槐

七里澗 在井陘縣東北諸山溪之水在縣北境者

皆匯流於此南入綿蔓河

龍井 有二一在正定縣北龍王廟前一在元氏縣常山龍王廟內

八角井 有二一在正定縣龍興寺後一在元氏縣東十五里有龍母碑記字多剝落

鷄鳴井 在正定縣北門月城內相傳井傍有石聲如小鷄故名

蒼石巖井 在井陘縣東南七十里又縣東四十里

有方嶺石井六北六十里有莊子頭井

鹿井 在獲鹿縣西南

獲鹿縣鹿井在井陘口南山下

寰宇記

輪井 在行唐縣

水經注云行唐城上西南隅有井大若輪水深莫

測謂之輪井

名勝志

滿井 在贊皇縣南萬井村南山絕頂上有龍王廟

天欲雨則井泉溢故名

聖井 在無極縣城北高陵村禱雨輒應故名

順德府

百泉河 在府城東南八里泉從地湧其流無數故
曰百泉一曰渦水亦曰鴛鴦水引流而東入南和
縣界為澧河

百泉一名渦水一名鴛鴦水流經南和境是為澧

河

穆孔暉南
和水利記

七里河 在府城南源出清風嶺東注於百泉

郡西阻山有泉焉出清風嶺下循郭南而東注合

百泉珍珠黑龍潭泉是為七里河

陳九功盛流開碑記

達活河 在府城西北五里即古蓼水也源自達活泉由府北東流入任縣與蔡河合

鉅鹿郡西北一舍有泉名達活咸平中刺史柳開濬旁植千柳建亭其上為一郡之勝熙寧壬子泉忽淪伏不見元豐改元之歲太守王慥禱於泉上不越月而復出因改名再來泉

曲洧舊聞

達活舊名蓼水出石井岡經任縣入蔡河

方輿紀要

達活泉出府西北南一泉曰紫金北一泉曰野湖

三水匯流總名曰達活北經邢之李道村東北入

任縣至薄村西與蔡河合

任縣志

響水河 俗名牛尾河源出府西北之紫金泉與達

活泉會分流東出環郡城而東北入任縣界合順

水河

野河 在府城西北百二十里即古渠水也源出西

山引流七十二道下流至任縣合於澧河

襄國西山渠水所出東北至任入寢

漢書地理志

野河在府西北百二十里發源百巖諸山引流凡

七十二道下流會於澧河

方輿紀要

漢書西山渠水即今野河也

邢臺縣志

白馬河 在府城北二十里源出內邱縣凌霄山南

流經府界又東入於任縣

沙河 在沙河縣南五里一名渴水源出山西遼州

流經縣界分為二支一入廣平府之永年縣經雞澤縣與洺河會為沙洺河一由縣南為程寨河亦曰新沙河由廣平府之雞澤縣至南和縣入任縣之東盟臺達泊

沙河縣以沙河在縣南五里因名

元和志

沙河縣湧水在縣西北七十里俗名沙河

寰宇記

沙河流至縣南分為二支一流南和至任縣一由

永年北下雞澤合洺河

冊說

程寨沙河河支流也一曰新沙河自沙河縣南經
雞澤縣之柳下村至南和縣由郝橋村六里入任
縣地三里至程二寨轉西二里至駱莊折北四里
至達家莊又五里至東盟臺達泊

任縣志

洪河 在沙河縣西北源出府栲栳洪山故名流經
縣西北納溫泉水會沙河東出合於澧河

澧河 在南和縣西十里即百泉河下流也自邢臺
縣流經縣界合洪河東注任縣又東入大陸澤

澧河上源即百泉水自邢臺經南和任縣

方輿紀要

澧河其源有二一自府西一自洪河分流經南和

縣北入任縣地至疙瘩臺前入雞爪河

任縣志

狼溝河 在南和縣五里即邢臺百泉水分流也自

沙河縣東北流經縣界合澧河

溝水深廣兩岸多狼故名

順德府志

滏陽河 在平鄉縣東七里自廣平府雞澤縣流入

又東北經任縣東又北經趙州隆平縣至寧晉縣

合漳河

滏陽河自雞澤縣三十里至平鄉縣之夏莊橋又四十里至任縣之新店橋又三十里至任縣之邢家灣又四十里至隆平縣之牛家河

磁州志

滏陽河自平鄉中義疇橋入任縣地統泄大陸澤諸河之水經隆平東下

任縣志

洺河 在平鄉縣西十里自雞澤縣流入與南和縣分界又沙河在洺河西五里北流合為一經南和

下任縣為沙洛河

平鄉之境左舒而右縮洛河在境上沙河在境外

沙洛合流在平鄉南和之間

方輿紀要

泚河 在內邱縣北自趙州臨城縣流入又東經唐山縣入趙州隆平縣界

泚水俗名脂溝

元和志

城北三十里為泚水河自臨城縣南合西北諸水

合流至尹村抵唐山縣西門轉而東流

內邱縣志

泚水舊在縣西一里南至任縣入漳康熙七年水

徙城北五里東入隆平縣界

唐山縣志

漳河 自山東邱縣分為二支一東北入廣平府之

威縣一西北入廣宗縣南又北經平鄉縣東又北

經鉅鹿縣東又北入趙州寧晉縣與滏陽河合

詳廣

平府

馬河 在內邱縣南即古龍騰水也源出本縣龍騰

山東流至縣分為二一東經小馬村為小馬河一

東南流入唐山至任縣合聖水河

平鄉縣龍騰水源出龍騰山在縣西七十五里

寰宇

記

縣城南十里有河發源龍騰山東流經柳林郊臺為馬河至張沱分為二其東下者為小馬河經小

馬村其南者傍鐵頂墓抵東

內邱縣志

馬河在縣西南十里東入於漳昔人見白馬東行

次日水潦隨馬蹄奔流而下遂成河故名

唐山縣志

馬河舊由馮村北流寨入洎今隨水勢自北引合

聖水河

任縣志

李陽河 在內邱縣北五里

李陽河發源自且停山之東有二焉一自陽武川

北答而來一自石河西邱而來合於城西一里轉

北而東至唐山縣之西梁村散於田

內邱縣志

沙洛河 在任縣東二十里洛水與沙河合流自南

和縣之北高村迤西入任縣界至石家溝入滏陽

河

蔡河 在任縣北十里源出府西山經邢臺縣之時
村入縣界分為二一南向環城為濠一北向東折
穿城而出合濠水東流入聖水河

蔡水發源達活泉稍東與紫金泉合踰三十餘里
至縣西郭昔人於此醜為二渠一南向環城為濠
一北向東折穿城為渠又北穿城而出與濠水合

東走二十餘里乃渚為湖

李景萃重
濬蔡渠記

聖水河 在任縣十五里發源本縣西北聖水井泉
從地湧出成河其南有蔡河合入行五里許有馬
河合入又東注於達活河

順水河 在任縣西百泉水之支流也自邢臺流南
和入縣界會牛尾河至趙五家圪臺注達活河又
殷陳溝河亦百泉河南支也由南和經縣界合澧
河

小漳河 滏陽支流也由廣平府永年縣經府城北

堤東下南和至任縣之劉累村亦名劉累河又南
注沙洺河又牛家口河亦漳水支流也由廣平府
曲周縣經平鄉入任縣界合滏陽河

雞爪泉 在任縣東北西接大陸澤諸水東通滏陽
河其北有溝名小雞爪亦洩水之路也舊時大陸
諸水悉由縣東北四十里穆家口洩於隆平名曰
滏河明嘉靖中發夫修浚自穆家口村至羊毛圪
塔上下相距共四十里後此口闌淤全泊之水獨

恃雞爪一河宣洩河身淺溢不足以容衆流於是
淦陽河水反由雞爪而內溢

今上雍正四年興修水利於穆家口故道疏濬深廣不使雞
爪一河獨受全泊之水由是淦陽之襟喉得通大陸
之尾閭亦快積潦日消民安種植誠萬世之利也
列葭水 在南和縣南

南和列葭水東入澮

漢書地理志

南和縣列葭水在縣西南十里下注狼溝河

寰宇記

按澆水於今無攷隋書地理志龍岡有澆水疑
即古泉河也

落漠水 即古薄洛津在平鄉縣西五里洛河分流

也下合滏陽河

漳水歷經縣故城西有故津謂之薄洛津

水經注

落漠水在平鄉縣西南十八里故薄落邑也語訛

為落漠

寰宇記

落漠河在平鄉西南本洛河分流於滏陽河

順德府志

沙溝水 在內邱縣北五里源出龍騰山東入龍騰

水

沙溝水源出鵲山東流經縣五里鵲山亦名龍騰

山

寰宇記

內邱縣沙溝水源出龍騰山引而東合龍騰水方

紀要

礪水 亦名渚水源出攬山下入沙溝水

內邱縣礪水源出攬山其水可以礪刀劍

寰宇記

礪水即渚水下入沙溝

明一統志

九龍水 在內邱縣鵲王廟前西山一派九水合流於此故名

按漢書地理志中邱蓬山長谷諸水所出疑即今之九龍水也

張甲河故道 在廣宗縣東

張甲河北絕河於廣宗縣分為二瀆左瀆經廣宗

縣故城西又北經建始縣故城東

水經注

經城西南四十里有張甲河神龍二年刺史姜師

度因故瀆開

唐書地理志

張甲枯河在經城縣東十里

寰宇記

縣東延五十里袤百里一望層沙亘十餘里即張

甲故瀆也

廣宗縣志

洺河故道 有二皆在廣宗縣東南

洺河故道由曲周龍塘村來縣境東南十五里至

李磨村東北入威縣之鹿臺又一支自威縣之河

窪村來縣境東南二十五里紅龍村合於鹿臺今

皆淤塞

廣宗縣志

枯淥渠 在廣宗縣東

經城縣界東去清河理五十四里有枯淥渠北入

南宮縣古冀兗二州於此分域

杜佑通典

玉霞川 在府城西二百里

時有霞色赤白相間瑩若玉光

順德府志

揚武川 在內邱縣西二十里相傳趙王張耳練兵

處

大陸澤 在任縣東北十里與鉅鹿縣及趙州隆平

縣接界

大陸既作禹貢

十數晉有大陸

爾雅
釋地

大陸孫炎云今鉅鹿北廣阿澤也

尚書
正義

鉅鹿禹貢大陸澤在北

漢書地
理志

衡水北經鉅鹿縣故城東路溫舒為里監門牧羊

澤中取蒲牒用寫書即此澤也

水經注

大陸澤在鉅鹿西北五里東西二十里南北三十

里葭蘆芡蓮魚蟹之類充牣其中

元和志

廣阿澤一名大陸一名鉅鹿一名大麓一名沃川

在鉅鹿西北五里

寰宇記

鉅鹿縣廣阿澤亦曰大陸接趙州隆平縣界瀕而

復流即寧晉之胡盧河也

方輿紀要

大陸澤在鉅鹿縣北五里任縣東北十里濘泓百

頃一洲中峙俗名小東湖又名張家泊

順德府志

大陸澤受水之處在任縣鉅鹿隆平寧晉一帶每

水發時浩淼無際

陸隴其畿輔地圖志

大陸澤廣袤數十里九河之水皆匯焉九河為洺沙蔡馬澧達活百泉聖水滏陽而澧河滏陽為之長九河之外尚有洺泚等八河皆自任之西南西北而歸於大陸澧獨深且長元郭守敬所以獨議開澧河也而滏陽則自穆家口統洩大陸之水經

隆平寧晉直下天津自萬厯二十六年漳河溢入
滏陽而降平以下地淺易淤於是滏陽又決而東
徙故道猶存所謂古滏陽也古滏塞而大陸之水
因從雞爪河以東瀉於新決之滏陽亦其勢使然也

王原祁大
陸澤圖記

按爾雅大陸載在十藪而尚書孔氏傳云大陸
之地已可耕作則又似以地言正義引孫炎大
陸即廣阿澤之說則仍主澤解蔡傳引爾雅廣

平曰陸之義而主地東陽陳氏云謂大陸為地者蓋以陸名地也謂大陸為澤者蓋大陸之旁有澤而因地以名澤也是又合澤與地而渾言之及觀孔氏之導河章傳又曰大陸澤名豈別一大陸耶詳繹經文大陸既作其義與雲土夢作人同冀傳所云地可耕作猶荆傳所云水去而地可耕治原不以大陸為非澤也夫水勢變遷涸溢靡定即以今大陸言之當水發時洪濤

浩淼一望無際及其既退疏渠修堰污泥橫潦
悉為膏壤以今準古又何疑焉或曰禹貢導河
北過洛水至於大陸班固地理志洛水在信都
大陸在鉅鹿鉅鹿在信都之南是先大陸而後
洛水與經文不合考正義漢書以襄國為信都
或洛水發源在此下尾至今之信都通典清河
郡經城縣界有枯洛渠北入信都襄國今邢臺
也經城今廣宗也兩邑相去僅百餘里則洛源

於邢經於貝達於冀水勢誠然而禹當日自大
伾而下絕洛而北即至大陸亦曉然易見不然
班固漢書兼採百家豈竟無據而云爾耶鄭元
以大陸在鉅鹿而指淇水為洛水杜佑以枯洛
在南宮而謂大陸在深州是因大陸而改洛水
之名因洛水而移大陸之地程大昌狃於通典
亦疑鉅鹿之廣阿非禹貢之大陸而張埒又以
洛水即濁漳改洛為絳是亦猶鄭元之臆說也

衆論紛紛遂使千古之輿地受誣而經義益晦
故特詳辯於此

五橋澤 在廣宗縣東

晉太元十年劉牢之救苻丕於鄴慕容垂北遁牢
之追之至五橋澤即此

方輿
紀要

蓮花池 在沙河縣南十里每夏月荷花盛開香風
十里

龍窩池 在南和縣西八里水深浪猛雖天氣晴明

池面亦多雲霧世傳龍潛於此

鳳凰池 在南和縣東北二十里縣志云北有鳳
池之清景

黑龍潭 在邢臺縣東南九里深不可測相傳有黑
龍潛焉

九龍潭 在沙河縣黑山下

響水潭 在南和縣東七里狼溝河水淺沙淤衝決
成潭水從潭北出遂為狼溝別支奔響如雷夜靜

聲聞數里

白鷺潭 在南和縣徐莊一里水勢潏迴岸多楊時
有白鷺波際翩翩捕魚者每得古器似商周法物
白龍潭 在南和縣西南沙河水匯此又秋水潭在
縣東七里

洗馬潭 在廣宗縣北八里洗馬村相傳漢光武洗
馬於此

洗腸淵 在內邱縣西十三里佛圖澄洗腸於此因

名

程家灣

在內邱縣西南三十五里以近程子華墓

故名

珍珠泉

在府城東一里泉湧如珠故名又馬跑泉

在府西皆入百泉

野湖泉

在府城西北十里下合達活水

玉泉

在府城西北馬鞍山下水湧若玉山南為金

泉

九家泉 亦曰洺河泉發源平地 下流狼溝河

溫泉 在沙河縣西北七十里即古湯水也四時常
溫可愈人病湯山在沙河縣西北七十里山海經
云湯山湯水出此湯水愈病為天下最

漆泉 在沙河縣西八十里色黑如漆

鴛鴦泉 在南和縣西八里兩泉並湧故名又清泉
在縣東葭里屯

鹹泉 在鉅鹿縣北

鉅鹿縣有鹹泉煮而成鹽百姓資之

元和志

聖井 在府城西北仙翁山下俗傳果老指此為井掘之得水

太嘗井 在府城西三十五里

世傳趙襄子為太子時嘗獵於此人馬俱渴乏水因禱於天以矢卜之遂得其泉深三十丈襄子嘗

之故名

順德府志

仙井 在南和縣治北

其水與地平深不可測上有仙人廟旱禱輒應

明志

潘井 在廣宗縣東俗傳潘美飲馬於此又傳牧馬處曰潘家窪在縣東南七里

廣平府

漳河 河有二源清漳出山西太原府平定州樂平縣沾嶺濁漳出山西潞安府長子縣發鳩山二水分流至河南彰德府涉縣東南合而為一曰交渾口東行二里入磁州西南境又東入河南彰德府

臨漳縣界從臨漳東北入廣平縣南界分為二支
一入大名府之魏縣至山東東昌府館陶縣入衛
河一入山東東昌府之邱縣又分二支一經威縣
之南東北行入冀州之南宮縣至天津府青縣亦
合衛河一入順德府之廣宗縣北行至趙州寧晉
縣會滏陽河抵冀州入滹沱河

按禹貢覃懷底績至於衡漳周禮職方氏冀州
其川漳漳之由來舊矣漢書地理志上黨郡沾

大黽谷清漳水所出長子鹿谷山濁漳水所出
水經注漳水於武安縣東清水東南來注之
世謂交漳口自此而上為漳之上流歷久不變
昔史起堰水以灌田魏武鑿渠而漕粟漳之為
利可知也磁州而下則決徙不常歷代以來或
亂於河通典河水橫流入漳是也或塞於衛元
史河渠志漳水潰溢衛不能通是也至明則挾
滏陽而北徙明外史河渠志漳河自永樂九年

與滏陽河合流是也

本朝則併滹沱而東溢禹貢錐指滹沱於順治二年從冀州合於漳水是也渾濤駭浪迄無一定而究其尾閭總以衛為歸其入衛也有二道一由山東館陶縣入一由天津府青縣入而其分流則自廣平縣始

欽定尚書會纂地理今釋漳水入直隸界至廣平縣分二支一支東行入衛一支為經流東北行經山東

邱縣界復分為二支許汝霖北河

聖功頌序漳自邱縣一折而東經威縣南宮棗強武邑故城景州阜城交河至青縣杜林村一折而西經廣宗平鄉鉅鹿抵寧晉縣會滏陽河至冀州又合滹沱河由衡水歷武邑武強入獻縣完固口由單家橋合杜林村之流至鮑家嘴歸運自威縣而東俗曰老漳河自廣宗而北俗曰新漳河而其由館陶入衛者自廣平經魏縣亦分新舊

二渠過元城而東注此近日漳流之大槩也攷其故道則潰溢四出志記所載異同參半水經注白溝東北經羅勒城東又東北漳水注之羅勒城在館陶之西白溝即今之御河則漳之分流入衛自古已然而顧祖禹方輿紀要云元時資漳以助運始引流於衛非也水經又云濁漳至昌亭與滹沱河會又過成平縣南合清河清河即白溝也則漳之合滹沱而入衛亦自古有

然而胡三省地理通釋云漳舊入河自河徙而南遂自達於海亦非也酈道元以衛漳合清河處謂之合口今青縣南有合口鎮然則杜林村之流猶漳之行其故道者歟或合與否又不敢強為附會也緣節錄水經濁漳篇參以酈注兼採諸志而以今之輿地釋之附錄備攷

濁漳水出上黨長子縣西發鳩山

漢志出鹿谷山淮南子出發苞

山魏志

東過其縣南

明統志長子故城在今縣西

又東經屯留

縣南

方輿紀要屯留故縣在今縣東南

又東經壺關縣北

山西通志壺關

故城在今長治縣東南

又東北經潞縣北

今在潞城縣西

又東經武

安縣南

磁州志磁在漢時為魏郡武安縣地

清漳水自涉縣東南來

注之清漳水出上黨沾縣西北少山大黽谷

漢志出鹿

谷山淮南子出揭戾山山西通志樂平縣西南有沾縣故城

南過縣西又南經昔

陽城

左傳杜注樂平縣有昔陽城

東過涉縣西屈從縣南東至

武安縣南入於濁漳謂之交漳口

磁州志涉縣東南田家嘴古名

交漳

又東出山過鄴縣西

彰德府志臨漳縣西有鄴縣故城

又東

經梁期城南

地理風俗記鄴北五十里有梁期城故縣也

又東經斥丘

縣北

元和志斥丘故城在咸安縣東南

又東北經列入縣故城南

寰宇記列入故城在肥鄉縣東北

又東經肥鄉縣故城北

城在今縣西

又東北過斥漳縣南

明一統志斥漳故城在曲周縣東

又東北經

平恩縣故城西

方輿紀要平恩城在山東東昌府邱縣西

又東北過曲

周縣東

磁州志曲周縣東橋向年漳滏合流於此康熙三十三年漳徙而東不經曲周矣

又北經鉅鹿縣故城東

今平鄉縣治也

又歷經縣故城西

明一統志經縣故城在廣宗縣東

又經銅馬祠東

寰宇記祠在鉅鹿縣東北

北過堂陽縣西

方輿紀要堂陽城在南宮縣西南

又東北過信都

縣西

即今冀州

又北經鄆縣故城東

禹貢錐指城在今東鹿縣東與深州

接界

又右經下博野縣故城西

方輿紀要下博城在舊州城南二十里

又東北過阜城縣北

禹貢錐指此阜城當在今武邑縣界

又東北經

武邑郡南

即今武邑縣也

又東北經武邑縣北又東北至

昌亭與淳沱會

昌亭即古東昌廢縣也在今武邑縣東

又東經弓高

縣故城北

北魏志阜城縣有弓高城

又東經阜城縣故城北樂

城縣故城南

明一統志阜城廢縣在今縣東樂城廢縣在獻縣西南

又東北

經成平縣南

方輿紀要成平城在交河縣東

又東左會滹沱別河

故瀆

漢志樂成滹沱別水首受滹沱河東至東北

又東北合清河謂之

合口

方輿紀要合口鎮在青縣南

滏陽河

即滏水源出磁州之神麇山流經州城東

北又東流入邯鄲縣東會渚沁二河又東北經府

城南轉而東經曲周縣東又北經雞澤縣東又北

入順德府平鄉縣界

神麇之山滏水出焉

山海經

淦陽縣淦水源出縣西北鼓山南巖下泉源奮湧

若淦之揚湯故以淦口名之

寰宇記

淦陽河源出磁州流至邯鄲縣東五里亦呼為柳林河東北經府城南東入曲周界左思賦北臨漳

淦注云淦水熱以其湧沸如淦故也

名勝志

淦水發源于鼓山之麓而上流八字澗浸淫之水亦常入焉東南行二里許與黑龍洞水滙其流始大黑龍洞即神麋山也淦水東行至州之南繞城

東北行至閭家淺入邯鄲縣界又東北流至府城南橋又轉府城東橋又北至曲周縣東橋向年漳滏合流於此康熙二十三年漳河分而往東三十年漳水復歸六月間仍分東流至今滏水又東至雞澤縣又東至平鄉縣界

磁州志

洺河 源自河南彰德府武安縣經邯鄲縣西又東經永年縣西又東北經雞澤縣東合沙河又北入順德府南和縣界沙洺合流為雞澤平鄉南和

縣接界處

武安縣洺水源出縣西北三門山山下去縣八十

三里

元和志

永年縣洺水在縣南三里

寰宇記

洺河距府二十里發源遼州經武安三達紫山北

雙流合匯起臨洺鎮入境內一泓清淺褰裳可涉

每夏秋水漲則為巨浸其下流至雞澤與沙河合

廣平府志

沙河 自順德府沙河縣流入經永年縣北又東經雞澤縣西與洺河會為沙洺河

余公河 在肥鄉縣西北明嘉靖中滏陽河溢瀾漫百里知縣余炯鑿此河以洩水民德之因名

舊滏河 在雞澤縣城西自永年通水閘北流經此又北達順德府平鄉縣界其道紆曲不能容水

本朝康熙七年知縣姜照挑浚新河以導其流自馮鄭村至亭自頭長二里許邑民利之為建亭河上名

治水

拳壯河 在廣平縣東十里漳河支流也東至平鄉縣仍合於漳

渚河 在邯鄲縣南其源有二一自縣西二十五里藺家河一自縣西南三十里閻家河二河俱出紫山合而為渚經縣南五里又東入滏陽河

沁河 在邯鄲縣西其源亦有二一自縣西北二十里巖崱河一自縣西北三十里牛照河二水亦皆

出紫山合而為沁經縣西北一里又東繞縣北入
滏陽河

按名勝志渚沁二河即古牛首水也水經注牛
首水出邯鄲縣西堵山東流分為二水入邯鄲
城經溫明殿叢臺又東經邯鄲阜東流出城合
成一川又東澄而為渚沁水又東入白渠蓋昔
時二水合而入白渠故統名之為渚沁今則二
水分而歸滏陽故析名之為渚為沁也

輸黿河 在邯鄲縣西二十里洛河支流也其水秋
夏之交散注田疇或抵城下與沁水同流相傳有
龍黿鬪此龍勝而黿負因名

衛河 亦名御河在清河縣東南二十五里自山東
臨清州流入縣界又東入山東武城縣界其故道
在縣西北即隋永濟渠也亦名瓠子渠

清河縣永濟渠近孤女冢元號孤女渠隋煬帝征
遼改為永濟俗呼御河

寰宇記

清河西北有隋永濟渠即衛河故道舊名酈子渠

明外史
河渠志

蔡河 在清河縣東南十二里東北流入武城縣界
又一字河在縣東北東流入御河

黃路河 在清河縣北一里其地斥鹵每衛河泛溢
由此下注南宮縣亦名黃蘆河

賀蘭河 在磁州西北三十里源出賀蘭山東南流
入滏陽河

泥河 在磁州西十五里源出本村沙石小橋下西北流入滏陽又羊渠河在州西三十里源出於本村之西半里許西南流入滏陽

牯牛河 在州北三十五里其源有二一出蔣村為北河一出林壇鋪為南河二水至落子村始合流至東城橋入滏陽又澗河在州北四十里源出河口村東北流經邯鄲縣北入滏陽

邯水 在肥鄉縣西

邯水發源邯山東北經邯會故城西北注漳水故

曰邯會也

水經注

洹水 在成安縣西南七十里自河南臨漳縣入又

東南注於衛

洹水出洹山山在長子縣也

水經注

洹水縣洹水自堯城縣流入

元和志

梁龍德二年戴思遠襲晉魏州西涉洹水拔成安

舊五代史

成安西南有洹水自河南臨漳縣流入界其下流

合於御河

明外史地理志

大河故道 有二一在曲周縣東五十里一在威縣

南清河縣北

宋元豐中大河經流於此河後南徙遺跡僅存

方輿

紀要

宋皇祐元年河合永濟渠東北經宗城縣東又東

北經清河縣東

禹貢錐指

漳河故道 有二一自磁州三臺口北流入邯鄲縣
經永年至曲周會滏陽河一自成安縣東南流歷
肥鄉抵曲周東一里亦合滏陽河自康熙二十三
年漳徙而南故道遂湮

漯河故道 在曲周縣東

自永年縣界泊頭堡接縣境西朱堡長十五里又
東接於漳河枯瀆遇雨漆滏水泛溢輒由此分流

北注

方輿
紀要

洺河故道 在威縣西

洺水舊在縣西自廣宗流經縣境合於漳河故隋

以洺水名城

方輿紀要

清河故道 在清河縣西

淇水東北過廣宗縣為清河

水經注

清河東北經廣宗縣故城南又東北經界城亭東

又東北經信鄉西又北經信城縣故城西又東北

經清陽縣故城西又東北經陵鄉西

水經注

清河縣去郡最遠而無所謂清河者往者黃河決

而東徙羣流匯焉無清河矣

廣平府志

阿難渠 在曲周縣南

阿難渠魏將李阿難所導故名

元和志

曲周縣阿難枯渠在縣南十四里

寰宇記

古白渠 在邯鄲縣南

白渠水出魏郡武安縣欽口山東南流經邯鄲縣

南又東經列人右會漳津地理志曰白渠東至列

人入漳是也

水經注

故漳渠

在清河縣南

枯上漳渠者濁漳渠也源自上黨枯下漳渠者清漳渠也自鄴縣界來非濁漳也隋大業中制使姚暹疏決從上漳渠水入此渠亦名姚暹河煬帝征遼回泛舟於此謂之回鑾河大業末竇建德於廣平郡又疏此水入柳溝遂與永濟合流

寰宇記

涉水渠

亦曰疏水在清河縣東

清河縣涉水渠自蓮花池達永濟渠先是衛河數決為害百姓奏聞下令開鑿為溝廣丈餘長四十里每遇汎溢賴此泄之

名勝志

五爪渠 在磁州西十里明洪武中知州包宗達引滏水分為五渠溉田千頃後漸淤塞萬曆十一年知州張夢麟復因故道開濬民甚利之

雞澤 在府城西南

雞澤在廣平曲梁縣西南

杜預春秋註

曲梁縣之雞澤國語所謂雞邱矣東北通澄湖

水經

注

永年縣雞澤在縣西南十里左傳諸侯同盟於雞

澤今其澤魚鼈菱芡州境所資

元和志

康臺澤 在曲周縣東

廣平郡平恩有康臺澤

魏書地
形志

苻秦時為閑牧之所晉太元九年慕容農取康臺

牧馬數千即此

方輿
紀要

海子 有四皆在磁州城內積水之處也

雁池 在雞澤縣南三十里雁池村相傳池內掘一

石佛有羣雁飛集於上因名

劍池 在邯鄲縣東南二十里

相傳樂毅自燕奔趙磨劍於此有石尚存

名勝志

照眉池 在邯鄲縣西北三里

池方數十畝相傳趙王宮人照眉於此

邯鄲縣志

蓮花池 在清河縣東南三十里

玉泉池 在磁州西北二十里溢泉營方圓畝許水
從地中湧出下流入淦陽河

董塘陂 在曲周縣西北

洺水縣董塘陂在縣西北十五里晉龍驤將軍劉
牢之救符丕追慕容垂大戰於董塘泉即此陂也

元和
志

賈葛澤 在府城西二十里受邯鄲西山之水東流
注淦陽河又琵琶潭在城西四十里

黑龍潭

在府城北三水其水深黑相傳有怪獸居

此又方頭固潭在府城北二十里

白龍潭

在肥鄉縣西六里

龍潭

在清河縣西南五里明嘉靖中大水匯成

八字澗

在磁州西北七十里支分派引流為八字

東南入滏河

邯溝

在邯鄲縣東水經注白渠右出即邯溝也今

湮

曲溝 在磁州北十五里以水流盤曲故名又駙馬溝在州西十五里

酒務泉 在邯鄲縣西十里其水甘冽俗傳趙王嘗釀酒於此今其地名酒務頭

隆興泉 在邯鄲縣西北二十里即輸黿河上流也
四時常溢歲旱禱雨多應

流泉 在磁州西白土里峯頂出泉民資灌溉又廣盛泉在州西四十里神麇山東流入滏河

蓮花井

在肥鄉縣東十八里

琉璃井

在邯鄲縣東三十里

此井不記世代今磚甃之上結成黑色琉璃一丈

許與水相值故俗呼為琉璃井云

名勝志

扳倒井 在邯鄲縣西北二十里


世傳光武為王郎所迫士馬皆渴因無汲具輒扳倒飲明萬厯間縣令盧雲龍命居民以繩測之東

西相去僅二寸許

名勝志

聖井 在邯鄲縣西二十里高阜上水與井平溢出
北流匯而為池禱雨常應

程井 在磁州儒學戟門之左宋知磁州程昞鑿
本朝康熙二十七年知州蔣擢重浚井建亭以覆之



畿輔通志卷二十三